

# **DEFINISI REMAJA DAN PEMBENTUKAN KONSEP KENDIRI DALAM HUBUNGANNYA DENGAN KELUARGA**

## **(Part 7)**

Azizi Hj Yahaya

### **4.2 Jenis-jenis Konflik Remaja – Ibu bapa**

Pencapaian akademik dan kerja rumah kerapkali menjadi jenis konflik utama dalam hubungan remaja dan ibu bapa. Kebanyakan ibu bapa meletakkan matlamat yang terlalu tinggi dan menuntut supaya remaja menghabiskan kebanyakan masa untuk belajar sedangkan remaja amat mementingkan aktiviti sosial bersama rakan sebaya. Pertengkaran dengan ibu bapa akan berlaku akibat tekanan yang dihadapi oleh remaja bercanggah dengan kekecewaan ibu bapa yang melihat anaknya gemar menghabiskan masa di luar bersama rakan sebaya.

Konflik juga berlaku mengenai perbelanjaan yang berkaitan dengan jumlah wang saku dan kebebasan membelanjakannya. Dalam konflik jenis ini kebanyakan ibu bapa cenderung mengukur kos hidup remaja berdasarkan pengalamannya dahulu sedangkan keperluan remaja masa kini berbeza sekali, seperti pakaian baru, hiburan dan rekreasi serta aktiviti sosial yang lain. Jika harapan remaja untuk mendapatkan sesuatu musnah akibat tiada sokongan kewangan ibu bapa, timbul perasaan tidak puashati dan konflik akan timbul.

Pemilihan rakan sebaya juga sering menjadi punca konflik. Kedua-duanya mempunyai persepsi yang berbeza mengenai pemilihan rakan sebaya. Menurut ibu bapa, latar belakang agama, etik, sosio ekonomi adalah faktur penting, sedangkan remaja mempunyai penilaian tersendiri seperti nilai hiup, personaliti, minat dan pengaruh positif yang diterima dari hubungan tersebut. Persepsi yang bertentangan akan mengakibatkan situasi tegang yang biasanya mendorong remaja untuk mencari sokongan dari rakan sebaya di luar dan menjauhi ibu bapa mereka.

Kebanyakan remaja perempuan mengalami konflik jenis percintaan yang berpunca dari pemilihan pasangan bercinta yang sering dikritik oleh ibu bapa. Kesesuaian teman lelaki mengikut ibu bapa dinilai kepada sosioekonomi, etnik dan agama sedangkan remaja perempuan berpendapat mereka telah membuat pemilihan yang tepat dan lebih memahami akan teman lelakinya. Ibu bapa juga bimbang jika anak gadisnya terjebak dengan tingkah laku seksual yang bertentangan dengan norma masyarakat, oleh itu mereka akan memberikan kawalan ketat yang menimbulkan salah faham, kritikan, pertentangan pendapat dan konflik yang besar di antara keduanya.

CONTINUE...